

羅浮山志會編

羅浮山志會編卷之十四

長洲宋廣業澄溪纂輯

藝文志五

賦

羅浮山賦

六朝  
謝靈運  
康樂  
陳郡

客夜夢見延陵茅山在京之東南明日得洞經所載  
羅浮山事云茅山在洞庭口南通羅浮正與夢中意  
相會遂感而作羅浮山賦曰若乃茅君之說神化是  
悉數非億度道單悒悒洞穴有九此惟其一潛夜引

輝幽境朗日故曰朱明之陽宮耀真之陰室洞穴之  
寶衢海靈之雲術伊離情之易結諒沈念之羅浮發  
潛夢於永夜若邈流而乘桴越扶嶼之細漲上增龍  
之合流鼓蘭橈以水宿杖桂策以山遊

羅浮山賦

宋 李南仲 英德

羅浮二山東西相聯迤句曲之洞號朱明之天連延  
大江之外崛起滄漠之墟乃百粵羣山之祖與南嶽  
而齊肩鐵橋鎖乎絕頂石樓峙乎半巔登覽遐極渺  
睇芊綿爾其周迴五百七十二里森列四百三十二  
峯迴谿峻谷巖崿崆嶺藻石璀璨瀑水玲瓏山出玳  
瑁竹茂籠葱羣雀五色靈藥千叢寂寞兮丹砂遺電  
岌業兮瑤臺隱空懸厓斗折徑路難通祥雲瑞霧晝  
夕朦朧時有岸幘羽服野人山翁忽去倏來不知其

蹤謂長生而久視亦往往寓乎其中時有萬舶乘風  
不知西東瞻我峻極煙光蒙茸洞谷黑昏開乾闥坤  
怒風叫號轟騰四門恍然之內隱隱若萬兵之屯呼  
吸號召鬼神湊奔徐而萬籟息朝霞暎日月晃耀氣  
象始溫又或五夜蕭森樂池奏音彷彿仙籟彈絲擊  
金疑有雲和之瑟空桑之琴青谷闕邃列仙下臨聚  
會靈族朋來盍簪列席環坐開廓冲襟疎檻廣庭寶  
除翠林海桃霞漿左右酬斟樂真言之恬淡憫世網  
之浮沉倏然往來不繼以淫瞬息萬里敢馳馭之駸

駿變化倏忽孰能究尋其上則有惟金三品梗枿杞  
梓翡翠羽毛虎豹犀兕竹箭丹砂絺繡絲枲珍角稌  
桶元龜象齒石蜜山焦黃精白芷蛾眉龍骨桂香桐  
子先供賞以克庭何九州之敢擬真足以燦上國之  
文章增皇家之盛美矧夫當祝融之宅位贊真主以  
乘離雲行雨施產英孕奇其在國家有大禱祈驛使  
奔走帝誠肅祇投金龍與玉版指道路以交馳將事  
之夕明靈鑒斯乃至翔鸞舞鶴繞殿紫芝仙壇祭訖  
宣室受釐萬有景福允王保之帝子王孫慶流本支

獻南山之壽詞天保之詩與夫他山頽壁徒當乎四  
達之達聖飾別館止可事乎遊嬉於功業兮何補於  
造化兮何裨豈比增高福地薦美天基鞏固四極鎮  
安外彝巍巍隆隆無騫無虧宸毫秘軸文彩葳蕤瑞  
謀顯著又奚論乎眞區之遠而名嶽之危

羅浮鳳賦

有序

元 吳 萊

羅浮鳳者海南小禽也家君自嶺回挈之北上予  
嘉其身負文采拔去幽阻而欲自售其羽儀也是  
知士之抱道德懷文章無微不聞無遠不達豈肯  
久滯于天涯海角之墟而遂已乎雖然予愧多矣  
乃爲賦曰

惟海邦之異產挺羽族之光華育火德而有耀控離  
垣以爲家迤赤土之重漲渺丹邱之僻遐顧性命之  
賤薄特盤桓於煙霞原夫自南自北載飛載止蜚不



妄集棲必倒跼青飾衣襟紺流爪觜信鳳藪之多奇  
類龜臺之所使吮夕秀於紫芝嚼寒香於瓊蘂雖斥  
鷃之同羣固鸞凰之等美於是本山川之迢遞羨體  
氣之自然故虞衡之弗及隔瘴癘以能全戒羅氏而  
弋舉命島夷以籠遷望上林而奉進跋神岳以增妍  
念安期之蓄養受抱朴之矜憐守一枝於嶺木得數  
粒於巖泉矧獸囿之可近任蛇微之長捐尙蓬蒿之  
改觀何鼎俎之容臚當其面南國之蒸爍泝古龍之  
沉隘宜稟賦之爾殊眇狼睨之昏昧裸黑質而無繒

甕鱗軀以弗磧奈屋居之何有望魚鱉而奔沛胡鵠  
鵠之種族獨哺飯以藻繪矧鞦莎而臆蘭匪距金與  
羽芥獻麗容而自媒炫靈表而罔害將尤物之移人  
豈凡禽之一槩若乃考黔羸之所毓鍾品彙而降祥  
負英姱而可貴闕草莽而愈彰心恒馳於北闕跡曷  
屏於東岡薦董賈之術業熾淵雲之辭章偉畎谷之  
文翟諒備采而有光遯炎洲之孔鵠或聚冠以見戕  
幸全生而特遇肯遽遠以回翔倘遲延於歲月恐泯  
滅於殊荒然則偶時景之和暢跂聞闔以延竚稽師

曠之補經驗治長之辨語感軒閣之銜圖副舜庭之  
率舞聲格磔而應絃勢盤旋而列簋祠爰居而眩惑  
責鵬雀以欺侮卵條支而必致毛弗森而易舉彼尋  
常之猥陋雖籬落其若阻相盛德之休明謂萬里而  
來覩是故士當貴而自重世何嫌於處卑磨山谷之  
巢穴侈朝廷之羽儀仰天地之廣大挺聖賢於窮羈  
極英材之銜鬻忍道德之擲遺惻朔風以吹野慘寒  
雪以刮肌屹碧梧而弗實挺篁竹以無枝鼓乘傳之  
壯志蘊棄繻之妙姿奈負貳之久枯窘侏儒之長饑

庶飛搏於鵬路終飲啄於龍池  
尙茲鳥之吐數遂歷  
言而詠斯

遊羅浮賦

明 湯顯祖

永仍  
臨川

夫星圖粵地引潮汐於元紐日次周天晷晝夜於陽  
陸然則南嶺之南北戶之北固已興象之所偏麗燭  
龍之所長窮矣而廬嶽天子之障衡山祝融之標樞  
軸雖連於西極經絡未窮於南紀高融與博是在羅  
浮羅山上直百粵之精旁羅赤溟之氣軒轅以降隆  
爲粵嶽矣而浮山者是惟蓬萊神山浮自會稽靈海  
斷鰲不足比其波蕩操蛇不足異其轉徙蓋流睽絕  
橋佇眙分畧飛峯息壤神理自然所悵鬱者名跡無

藹采眞莫續湧塔暗朝花之影沉湖銷夜樂之音每  
與友人祁羨仲曾人倩共嘆恨其奇大有終焉之意  
而東官陵祀升踐靡由辛卯冬十月始以出尉徐聞  
速令尹崔子玉於南海遲文學翟從先於東莞樾川  
墟復原隰宿朱明曜眞之館候晴霏焉蓋晦夕也詰  
朝朔微雨襲梅墟徑石門聽泉於葉大夫春及之廊  
阿明日觀大簾泉避雨朔朏弔湛公於黃龍講堂道  
其窄硤夜火青霞洞口有湛公樓七楹仙鼠居之此  
盡下界三矣明日起青霞至顛際觀日出爲中上六

界美人峯殊好神如道人時時出雲其下千仞葉大  
大石館處也始華露欲晞見城郭者四五前立石  
雙如蛾翅豎又立石翦爲燕子門一名彈子門爲美  
人障其前蟾蜍峯也同人不前獨往彌勝從數羽衣  
人芟蘊而上鳥道二十餘里迴翔眩視草樹飛走光  
氣有異非所經識意謂靈境阻鬱剗然一岡平曼修  
婉名以子午正其昏朝登頓再舍圭陰未出遂躡飛  
雲凌日觀唯見香爐一具白水一卮祀羅浮君焉望  
天池以陽星沙而陰東連扶津之藹西盡崦嵫之色

靡不區封有畛貽貌無倪者矣可謂恢魁乎大觀淵  
綿其神致也哉枕石起臥欣然賦之擬於謝靈運想  
以浮寫差爲飛愜云爾極廬衡之經首曄亦嶽於黃  
禺畧招搖之桂樹望風氣於蒼梧問津途於莞城釋  
泛舟於源墟灑林霏於窈窕漠岩戶之紆徐晨光飛  
而首路夕影流而載驅倒煙容於衿帶睇朱明於隙  
餘磴環頽於莽蒼林纖密以扶疎策孤征而晻影烏  
羣歸而沸呼傍靈池以涉吐歷廻梁而聳軀鐘鼓鳴  
於林間香氣騰於路隅是爲帝軒轅之所履神赤標



之所廬坐參正而披衣閱柳巾而定居何遷人之執  
掌得借一於冲虛靈想接而心歡營宅清而寐除慨  
衣冠而委土想丹竈之流珠問洗藥於真火發靈簫  
於聖姑守瑤光之玉虎戴碧斗之銅魚恨天華之宮  
不存怨明月之壇久蕪斷瀛心其莫引翳神光其忽  
諸徒使來粵都者走明珠於合浦浮毳衣於賈胡彼  
臯壤與山林非天性其焉如將縱觀其窟宅恣風雲  
之襲余若有人兮山中葉公逃其大夫瞰神峯之育  
渺感鮑女之來胥築清泠之妙館移家室於真圖半

九天而一息卷懸泉而自舒契蘭溪之趙相詠明懷  
於彼姝悵峨眉之脈遠覺茅山之氣殊諒仙人之藐  
矣居其坐以鬱呼度石關之穹窿接新構之離婁泉  
淙淙而夜鳴雲英英而晝敷清不可兮久留澹容與  
以踟躕山帶氲而翠積水簾波而素紆營磐砥兮偃  
仰蹙葩華兮噴噓避雨蝴蝶之洞睨梁天漢之虛彼  
增城之湛子洵赤海之名儒匪淳耀其外麗有精神  
而內攄吐經書以元澹集龍鳳以娛娛若洙泗之閭  
閻冉夏屋之渠渠委樓觀於山精寄田業於門徒聖

無存而不妙凡有亡而必粗疑海波之增減窺戶牖  
之有無蘊苦心其爲誰遡流風而涕俱於是拂金沙  
今夜語蹶青霞今日發逗威彝而宛轉望敦龐而映  
軋澹孤青於氣表漏陽華於空閱峩崖隤於川渠錯  
璵璣于樓閣雖道絕於登降亦下臨其曲折緬增城  
其在茲遞仙風而岌擊俯龍門而直上有流光之影  
撇徵上界之精華照下方之明滅何峯容之偉奇漾  
真人之秀烈偶麗石之前臨露參差而障列如倚翅  
以斯冲似懸帆之次揭映神姬之出雲美朝敷而暮

晰轉靈蝸而下視象寒津之嗽嚙始浮山而浮來自  
會稽而涌垤覽至今其艸木有東方之種別混合際  
於羅邱度鐵橋而綴缺豈華靈之遠擘非秦王之近  
設抵半舍而泉分宿煙炊而飯潔託木末崔子玉之  
下來愴石罅翟點蒼之困歇信絕地之行難豈中天  
而輟轍定飄搖而整巾豫蹶跚而結襪頓金策之拳  
奇步羽人之勃窣上登翳其若梯進孱顏其若闌隋  
壁虛而溜浮積泐欹而苔滑寄掌股於旁徑托根趾  
乎肩輿蓋起瑤池而躡飛雲周三十里之靈樾象耕

之所絕蹊雉樵之所迷術肆奇樹之葱龍并異卉分  
冥密紺蒼凝而互陰碧鮮流而競發固風霞之所謁  
葑亦丹青之所注鬱有一花而四照有五色而一節  
或建日而無影或嵌空而有雪青珠冷風其欲乳珊  
瑚叢生而逾活神靡倚其雍容仙魑影而撒拂木客  
離筵而似語山魃隱映而倏忽別有朝菌若雲夜芝  
如月翠羽攢青金粉浮散曩得一而爲艷此成林而  
不掇固靈境其常然嘆人生之觀絕謂林封而徑窮  
忽岡巒之秀濶儼撐距而不前乃案衍而條達曉發

足於青霞午凌岡而載芡候鷄鳴於上霄降茲巒而  
木末正子午之嘉名定昏曉之相割念人間之急晷  
劣旋車而已瞥矧山行之阻迂慮峯攢而影咽竟凌  
霄而未禺何鄧林之蚤渴豈日氣之偏延非海陰之  
所遏遂徑庭其造天極空窠而戴日屬湘疑於壘碓  
辨交廉之壠埒眇蒨木於河林認扶桑之渤碣揆瓊  
州而地矯引長星而天豁布吟蠻之茫茫衆每生而  
忽忽偶旦宅而推排糅山川與名物昔冥丘而去燕  
今南池而徙越爲情多其苦悲亦心淺而易悅塵影

舍而智虧年路深而意沒夜樂何時而遇仙華首何  
因而禮佛忖凡情於聖真若闕觀與窮髮將無始之  
趨未融令有終之相難閱朱鳳沫而潭氛碧鷄殷而  
石裂寬異鳥其參差意靈禽之彷彿宮觀巋而如在  
丘嶺虛而起屈吾將洗浮盪於自然悟空明於一切  
朱陵之花靡謝曜真之氣長結睟光景兮隻不知乎  
知之所窮靚凌競兮吾以觀平日之所出

仙人掌草賦

明黃佐

泰泉香山

有仙人之瑤草惟龍洞之嘉生毓金沙於后土承日  
景於朱明殖深根而擢穎謝修幹以敷榮展青鸞之  
羽葉攢威鳳之毳英爾乃元覽啓其前圃藂陰映乎  
松篁沾鸞林之瑞露翕神霄之寶光子珠擎乎翠掌  
蒼赤綦乎中黃傲冬雪而奮起迎凱風以翱翔諒抗  
時而耀質遙作對乎南貞補桐君之遺錄起葛令之  
丹經盍朋簪而萃止盈傾筐以胥慶同服食以霞舉  
集瑤池而濯纓



表

賀古樂器表

唐

王

維

摩詰  
太原

臣維言伏見今月七日中書門下敕牒道士申太芝奏稱伏奉恩旨令臣往名山修功德去載六月二十

日於南海葛洪居處

指冲虛觀

至誠祈禱中夜恍惚見一

老人云是茅山羅浮神人常於七曜洞來往

卽七星壇

昔

會九疑山於桂陽石室中藏天樂一部歲月久遠變

爲五野豬彼郡百姓捉獲汝可往取獻皇帝每祈祭

但依方安置奏之卽五音自和天仙百神應聲降福

所求必遂壽命延長臣奉神言卽往桂陽尋問百姓云天寶二載村人常見有五野猪逐之便走入石室就裏尋覓化爲石物五枚衆共驚異臣取以扣之音律相和與神人言不異今將奉進者臣聞陰陽不測之謂神變化無方之謂聖唯神與聖感而遂通伏惟開元天寶聖文神武應道皇帝陛下居皇建之極中得混成之大道奉先天之聖祖元化協於無爲育率土之羣生至仁侔於陰陽然猶精意不倦聖祀逾崇遍禮羣仙思祐九服故得麗眉皓髮遙同入昇之人

眞訣元言來告馭風之客棲身七曜以俟唐堯藏樂  
九疑不傳虞舜留茲石室思獻玉墀憑野豕以呈形  
表洞仙之屬意且神物思變古亦有之龍躍平津實  
爲寶劍鳬飛葉縣空餘素履器非上品人纔下仙猶  
能精誠聿修神變浚若况殊庭致祝天老效祥願授  
至尊以享上帝亦旣考擊動諸律呂韶濩慙其九奏  
雲咸失其八音翠鳳入於洞簫殊非雅韻朱鷺傳於  
鼗鼓敢比仙聲天地同和神祇降福無窮之壽永撫  
寶圖無疆之休以康庶績實由至德斯感大道元通

神人親告於休徵靈仙不秘其空樂稽之古昔實未  
見聞臣等限以留司不獲隨例抃舞不任踴躍喜慶  
之至

頌

山桃頌

六朝江

淹

文通  
濟陽

惟園有桃惟山有叢丹葩擎露紫葉繞風引霧如電  
映煙成虹伊春之秀乃華之宗

菖蒲頌

江淹

藥寶靈品爰乃輔性除疴衛福獨邪養正縹色外妍  
金光內映草經所珍山圖是詠

中閣頌

宋 高 紳

景德四年仲冬乃命大內太傅高班內品李懷信  
賁齋文建道場於羅浮中閣禪院七晝夜乃降內  
府名香以錫之爲民作福蓋天意也是山按圖牒  
爲蓬萊之別島實朱明之洞天蘊秘韜奇含靈蓄  
異璫花琪葉鎮以紫鳳之壇駕歛騰煙宅以白雲  
之洞爾乃寶坊清邃祇樹幽深紺殿晨巖蘭膏夕  
燎祝辭秘奧禱梵俱於五天簷葡萄氤散香雲于  
三界有五色珍禽羣翔齋所靈應續紛而效祉陰

雲霾蔽而復晴其真感有如此者謹爲頌曰  
巖巖羅浮鎮於南裔三山一海浮空而至開闔煙嵐  
蒼翳松桂蓄異康時宅靈瑞帝吾皇撫運惠綏四時  
名山大川罔不肅祇乃建中閣民祈福禧法會攸啓  
天意聿隨皇皇者華將命精絜圓嶠香降博山焚爇  
川祇薦瑞天龍生悅五色靈禽翔飛溲沱



桂酒頌

蘇軾

禮曰喪有疾飲酒食肉必有草木之滋焉薑桂之  
謂也古者非喪食不徹薑桂楚辭曰奠桂酒兮椒  
漿是桂可以爲酒也本草桂有小毒而蘭桂牡桂  
皆無毒大畧主溫中利肝肺氣殺三蟲輕身堅骨  
養神發色使常如童子療心腹治疾爲百藥先無  
所畏陶隱居云仙經服三桂以葱涕合雲母蒸爲  
水而孫思邈亦云久服可行水上此輕身之效也  
吾謫居海上法當數飲酒以禦瘴而嶺南無酒禁

有隱者以桂酒方授吾釀成而玉色香味超然非  
人間物也東坡先生曰酒天祿也其成敗美惡以  
兆主人之吉凶吾得此豈非天哉故爲之頌以遺  
後之有道而居夷者其法蓋刻石置之羅浮鐵橋  
之下非忘勢求道者莫至焉其詞曰

中原百國東南傾流膏輸液歸南溟祝融司方發其  
英沐日浴月百寶生水娠黃金山空青丹砂晨曦珠  
夜明百卉甘辛角芳馨旃檀沉水乃公卿大夫芝蘭  
士蕙蘅桂君獨立冬鮮榮無所懾畏時靡爭釀爲我

醪淳而清甘終不懷醉不醒輔安五神伐三彭肌膚  
渥丹身毛輕泠然風飛躡水行誰其傳者疑方平教  
我常作醉中醒

贊

柑橘贊

王叔之

節重履險操貴有恒二樹保榮四運齊能在質惟美  
于味斯弘異分南域北則枳橙何以比之三壽爲朋

偃松屏贊

有序

蘇軾

予爲中山守始食北嶽松膏爲天下冠其木理堅  
密瘠而不瘁信植物之英烈也謫居羅浮山下地  
煖多松而不識霜雪如高才勝人生紈綺家與孤  
臣孽子有間矣士踐憂患安知非福幼子過從我

南來畫寒松偃蓋爲護首小序爲之贊曰

燕南趙北大茂之麓天僵雪峯地裂冰谷凜然孤清  
不能無生生此偉奇北方之精蒼皮玉骨礲礲鬱鬱  
方春不知迺寒秀發孺子介剛從我炎荒霜中之英  
以洗我瘴

二賢贊

有序

宋唐庚子西

葛稚川化去三十餘年單道開始來羅浮今山中  
人知有稚川而不知有道開蓋稚川旣爲鄧嶽所  
留居山燒煉著書者數年丹竈具存而道開平日

惟食細石數百澹無所爲以故後世莫得而著陳  
郡袁宏雖作道開贊而贊文亦不復見於世遂作  
二贊書於山谷不顯其處以貽後代之好奇者云  
江左日陋無復德輝翔而不集翩然南飛鄧嶽細兒  
處仲餘黨豈有識知亦復瞻仰吾緣外母遂居羅浮  
豈以嶽故而議去留所就者大寧恤其小吾與嶽遊

如狎鷗鳥

右葛洪

世人茹柔剛則吐之起砂爛飯口如牛呵至人忘物  
剛柔一致其視食石如啗餅餌此乎飲羽出於無心

食石之理於性可尋我雖不能而識其理庶幾漱之  
以礪其齒

右單道開

### 羅浮圖贊

朱陳堯佐

希元  
閩中

羅浮山惠州之望也按本經云山高三千六百丈  
周圍五百二十七里然羅山一山也浮山卽蓬萊  
之別島也堯時洪水浮至依羅山而止故有羅浮  
之號焉又曰第七洞天卽此山也戊戌冬僕出官  
潮陽庚子春權牧茲郡公餘命駕山下覩二嶽之  
異跡幽巖步遂谷累日彌夕愛之忘返乃召畫工

相與立山之陽審望詳視卽而圖之旣成携以歸  
凡見之者雖草野漁耒之子必曰茲羅浮山也一  
無殊焉噫是亦得其真矣雖不能流泉出雲鳴鹿  
嘯虎至于寺觀之隱見聚落之向背左右遠邇亦  
梗槩焉惜其委之海隅卓爾天外好事者有見其  
亦庶乎贊曰  
惟墨之妙惟山之肖豈曰筆精亦是心照白雲未封  
清明空耀嗟乎翠岑委此遐徼

指掌圖贊

宋

鄒師正

冲虛  
道士



神山峩峩南海是疆蓬萊一島浮自東方駢支合體  
陽耀陰藏仙夫鱗萃不顯其光福庭肇啓真我遐邦

指掌圖贊

王 胄

希戴清源

羅浮二山綿亘高遠峯巒巖洞在在靈迹常往遊  
焉浹日登眺百未一及歸來深以不徧識爲恨冲  
虛鄒道士書爲圖名以指掌自記之袖來出示一  
覽之餘勝槩盡出噫須彌雖大芥子可納羅浮雖  
廣尺紙可圖卽圖而觀方寸自有羅浮矣爲之贊  
山之高不知其幾千丈一睹是圖如指諸掌山之太

不知其幾百里是圖一睹如掌可指誰謂圖小其大  
何如羅山浮山具載無餘何必登高觀圖足矣可以  
遠世俗之塵慮可以趣神仙之要指葛稚川何人哉  
爲之則是

圖經贊

以下十一首  
俱見前志

明黎民表

推微  
從化

神山峩峩南海是疆蓬萊一島浮自東方駢支合體  
陽耀陰藏仙夫鱗萃不顯其光福庭肇啓莫我遐邦  
洞巖贊

太極構形山川播氣石關金闕是稱神麗惟彼朱明

元黃咸備地道潛通便門旁啓爲大洞天眞仙攸憩

泉池贊

湛澹珠泉其流泌澌丹液所委酌言孔冽靈或石開  
響如赴節上士飲之心瑩神徹惟托幽遐是全高潔

塔寺贊

鬱鬱羅陽化爲靈鷲金布檀積以成斯構館抗烟雲  
階湧泉溜攝性降心眞源是究神僧在焉如聞梵咒

壇觀贊

逖哉龍馬風馭來儀接神修道是啓崇祠瑤臺森列

玉女旁規山水迴香靈仙護持自非真氣孰奠元基  
庵廬贊

養真成神必資元境矧我儒仙不求專靜懿哉釣鰲  
關除蹊徑澄心坐觀載涵載泳遂令海濱奮而作聖  
名賢贊

華風旣啓衣冠浸盛襲冕瞻奇被褐懷靜寤寐煙雲  
留連篇詠立德雖殊修名則競高距可追後賢斯鏡  
仙釋贊

老稱抱一佛悟歸空清淨慈儉惟道之同方瞳白足

孰究其宗有截羅浮麗于日中學子反求內鏡斯融

古蹟贊

靈谷播遷滄桑作變倬彼靈墟神仙留盼有翼堂構  
倏焉露電故壇化蝶空梁出燕逝者如斯長生可羨

品物贊

嶺海神臯百嘉所植或翔或擾偉其形色桂挺巖阿  
芝生石側桂父是嘗葛侯所食圖形山笥庶資博識

雜記贊

孔撰福庭益稽山海神理幽玄靈通遐昧二山合離

本徵志怪廣撫興聞庶存梗槩副在名山以俟千載

八仙贊

明黃一畿宗十香山

羅浮道士每談靈蹟必曰八仙石攷其所詠有溜  
流漱石之語蓋水本天一者道樞此豈其微與  
揆以先天之說則夜半見日乾道也泉源分流坤  
道也夫天非地不泰水非日不和意或是之取爾  
抑亦好事者贗爲之歟然而與且奇矣霞馭果臨  
則朱華鮑葛單蘇軒黃其人也道士必諍以爲鍾  
呂之儔且曰飛仙無跡未必專棲此山也及玆以

決之道士得勝予因令枚數而其一不明或云劉  
海蟾又云何仙姑予謂二人皆純陽弟子海蟾得  
道最後未必同遊矧女仙不宜混其間獨王文端  
公以爲徐神翁蓋必有徵據矣於是又決以琰子  
獨得勝相視大笑道士遂從予說予因索筆各爲  
之贊云其辭曰

張老通元皓首堯年乘此白驢避彼則天婦謝玉真  
算迷和璞齒髮返童翔于寥廓

張果老

策杖玉虛名列金書足雖偏跛神全色愉鶴骨鶉衣

浩然無愧優游清都千二百歲

李鐵拐

赳赳雲房漢將之良晚師東華道成正陽虎狼息威  
鸞鶴就駕鐵面戟髯葉衣羽化

鍾離翁

洞中之賓塵外之人回仙變化莫測其神飛劍火龍  
朗吟湖嶽風巾雲袍青天一鶴

呂洞賓

國舅懷寶蓑青雪縞竊得玉枕踏斷京艸龍藏虎伏  
隨綠色蘋靈源大道游歌紫清

曹國舅

東海與區神翁所居安期羨門相與爲徒大藥刀圭  
蟬蛻不死三島十洲一日千里

徐神翁



襦衫擁臂單韉騰醉氣薄青霄語諧濁世執板踏歌  
其樂如何長景明輝金闕嗟峨

藍彩和

秀出昌黎幼陟丹梯花開頃刻巧奪天倪雪擁藍關  
雲橫秦嶺超然童初俯視塵景

韓湘子

銘

蘭菊銘

王叔之

蘭既春敷菊又秋榮芳薰百草色艷羣英孰是芳質  
在幽愈馨朝斯夕斯願言永貞

羅浮山銘

梁河東王蕭譽

神哉蓬島合影羅岑南濱溟渤西負桂林龍隈斜峙  
牛嶺旁升形高華霍德邁衡岷橫天起巘插雲生襲  
修崖蔽景孤峯鳳立所謂曜真仙靈攸集鮑靚栖偃  
葛洪餌丹梁盧王佐控鶴軒鸞翠袍挂日朱霞冒冠

寶文可佩冰玉宜餐羣生浮隙隙電盈輝枝葉禮義  
黥劓是非無因獨往山阿采薇吐納冲氣卷服雲衣  
亡他利己骨損身跳至人齊物中還蘊妙灰心守一  
形枯道要史吹姬笙嵇琴阮嘯桃出李旁李生桃側  
無俟相因李僵桃食桃李雖榮絕無久艸不摧松桂  
歲寒表色甘惟一味安止容膝神以動疲驕隨滿溢  
滿溢則歆淳真志畢積想幽人羨茲貞吉敢刻名山  
勒銘斯實

資福寺舍利塔銘

蘇軾

自有生人以來人之所爲見於世者何可勝道其  
鼓舞天下經緯萬世有偉造物者矣考其所從生  
實出於一念巍乎大哉是念也物復有烈於此者  
乎是以古之真人以心爲法自一身至一世界自  
一世界至百千萬億世界於屈信臂頃作百千萬  
億變如佛所言皆真實語無可疑者至於持身厲  
行練精養志或乘化而仙或解形而去使枯槁之  
餘化爲金玉時出光景以作佛事者則多有矣其  
見伏去來皆有時會非偶然者予在惠州或示予

以古舍利狀若覆盂圓徑五寸高三寸重一斤二兩外密而中疎其理如芭蕉舍利生其中無數五色具意必真人大士之遺體蓋腦之在顱中顱亡而腦存者予曰是當以施僧與衆共之藏私家非是其人難之適有東莞資福長老祖堂來惠州見而請之曰吾方建五百羅漢閣壯麗甲於南海舍利當栖我閣上則以犀帶易之有自京師至者得古玉璧取以薦舍利若合符契堂喜遂併璧持去曰吾當以金銀琉璃窰堵波置閣上銘曰

眞人大士何所修心精妙明含九州此身性海一浮  
漚委蛻如遺不自收戒光定力相烝休結爲寶珠散  
若旒流行四方獨此留帶犀微矣何足酬璧來萬里  
端相投我非予堂堂非求共作佛事知誰由瑞光一  
起三千秋永照南海通羅浮

鐵橋銘

明孫繼芳

維鐵在冶五金之堅藏精于地受質於天日用攸需  
能人則然匪釜無食匪耜無田利用者兵皇威用宣  
未聞爲橋橋步千川茫茫南海浴日浮天蛟鱷之窟

蛇龍之淵洪濤巨浪駭波泊沿易橋爲舍以淑羣賢

騷

望瑤石臺辭

明區大相  
高明

瑤臺兮雲浮  
菌閣兮慧樓  
溯赤水兮負元洲  
飛仙遨兮駕蒼虬  
星辰朝兮絳闕  
日月環兮丹邱  
孔蓋兮龍旂  
仙人兮紛紛而來遊  
瑤臺高兮縹渺中  
有人兮丹顏綠髮  
而衣縞翳玉芝  
兮擗琅玕  
擎若華兮刈朱草  
珠入海而爲樹  
桂逾嶺而成林  
塵塩旣不可久處  
兮夫孰表予之遐心  
將托朱鳥以爲媒  
又要之以鳳好  
朝脂車於鴈門  
夕弭節於瑤島  
虎驟乘而耽耽龍



服衡而矯矯憩落落之長松涉涓涓之行潦聆仙樂  
於雲門抗飛旌於霞表招虞帝於蒼梧兮寘軒后於  
洞庭憂雲璈兮瑤佩披霞帳兮曲璫美嘉橘兮秋實  
擘桂樹兮冬榮歲道道其將迫心搖搖如懸旌

題後湖蘇公碑陰

紫霄子

若有人兮心浮雲莽碧悠悠兮瑤艸芬芬司羅山兮  
從葛君栖薜荔兮探真源注想初兮繫何言邁馬跡  
今駐秋駕真人倏來兮兆江夏投瑤簪兮回首約重  
遊兮洞玄夜黍一炊兮百年鶴飛去兮啼猿望青都

今未還遺翠琰今空山玉樓高今珠宮寒歛風生兮  
澗潺湲

羅浮山志會編卷之十四

終

羅浮山志會編卷之十五

長洲宋廣業澄溪集輯

藝文志六

四言古詩

洗藥池

晉葛

洪稚川  
句客

陰洞泠泠風佩清  
清仙居永劫花木長榮

羅浮

六朝王叔之

菴靄靈嶽開景神  
封綿界盤趾中天舉  
峯孤棲側挺  
層岫廻重風雲秀  
體草木媚容

五言古詩

羅浮

六朝  
江淹

紫煙世不覲赤鱗庖所捐白雲炎海外蒼藍起三山  
蕭瑟玉輝上容與羅山前欲知清都裏乘此乃登天

鳳皇谷

王叔之

客從北方來言欲到交趾遠行無他貨惟有鳳皇子  
百金我不欲千金難爲市誰知巖穴中簫笙終夜起

羅浮五色芝

庾肩吾

踟躕玩芝艸淹留板桂叢桂叢方便蹇枝葉正玲瓏

如龍復如馬成闕復成宮黃金九華發紫蓋六英通  
隱士蒼山北神仙赤海東隨丹聯變水獨處不須風

翡翠

唐

陳子昂

伯玉  
射洪

翡翠巢南海雌雄珠樹林何如美人意嬌愛比黃金  
殺身炎州裏委羽玉堂陰旖旎光首飾葳蕤爛錦衾  
豈不在遐遠虞羅忽見尋材多信爲累嘆息此珍禽

送友人之羅浮

唐

李白

太白

桂水分五嶺衡山朝九疑鄉關渺安西流浪將何之  
素色愁明湖秋渚晦寒姿疇昔紫芳意已過黃髮期

君王縱疎散雲壑借巢彝爾去之羅浮我還憩峨眉  
中道濶萬里霞月遙相思如尋楚狂子瓊樹有芳枝

禪房懷友人岑倫

岑時南  
遊羅浮

李白

嬋娟羅浮月搖漾桂水雲美人竟獨往而我安能羣  
一朝笑語隔萬里歡情分沈吟綵霞沒夢寐羣芳歇  
歸鴻度三湘游子在百粵邊塵染衣劍白日凋華髮  
春風徧楚關秋聲落吳山草木結愁緒風沙愴苦顏  
竭來已永久頽思如循環飄飄限江裔想像空留滯  
離憂每醉心別淚徒盈袂坐愁青天末出望黃雲蔽

目極何悠悠梅花南嶺頭長空滅征鴈水濶無還舟  
寶劍終難托金囊豈易求歸來倘借問桂樹山之幽  
送族弟襄歸桂陽

李白

余欲羅浮隱猶懷明主恩躊躇紫雲戀孤負滄洲言  
終然無心雲海上同飛翺相期乃不淺幽桂有芳根

詠懷

唐杜甫子美

邦危亂法則聖遠益愁慕飄飄桂水遊悵望蒼梧暮  
潛魚不銜鉤走鹿無返顧皦皦幽曠心拳拳異平素  
衣食相拘闕朋知限流寓風濤上春沙十里侵江樹

送行少吉日時節立復度井竈任塵埃舟航煩數具  
牽纏加老病瑣細隘俗務萬古一死生胡爲足名數  
多憂汗桃源計拙泥銅柱未辭炎瘴毒擺落跋涉懼  
虎狼窺中原焉得所歷住葛洪及許靖避世常此路  
賢愚誠等差自愛各馳驚羸瘠且如何魄奪針灸慮  
擁滯僮僕慵稽留篙師怒終當挂帆席天意難告想  
南爲祝融客勉強親杖屨結托老人星羅浮展衰步  
前年往羅浮步屐南海濶大哉陽德盛榮茂恒留春

贈羅浮僧元慧

唐韓愈題之



鵬鵞墮長翮鯨戲側修鱗自來連州寺曾未造城闔  
日携青雲客探勝窮涯濱太守邀不去羣官請徒煩  
囊無一金資翻謂貴者貧

羅水增江口示湘姪

韓愈

雲昏水奔流天水潏相圍三江滅無口其誰識涯圻  
暮宿投民村高處水半扉犬鷄俱上屋不復走與飛  
篙舟入其家暝聞屋中啼問之歲常然哀此爲生微  
海風吹寒晴波揚衆星輝仰視箕斗高不知路所歸  
舟行亡故道屈曲高林間林間無所有奔流但潺潺

嗟我亦拙謀致身落南蠻茫然失所詣無路何能還

將遊羅浮登楞嚴臺訪羽客

唐

李羣玉

文山  
澧州

清遠登寺臺晃朗縱覽歷濯泉喚仙風於此蕩靈魄  
冷光邀遠日百里見海色送雲歸蓬壺望客滅秋碧  
波瀾收日氣天風回澄寂百越入掌中十洲點空白  
身居蜚鳥去口誦元元籍飄如出塵籠相望吹簫客  
冥冥人問世歌嘯不足惜竭去羅浮頂披雲煉瓊液  
謝公雲岑興可以躡高迹吾將抱瑤琴絕境縱所適

羅浮山夜半見日

唐

劉禹錫

夢得

海黑天宇曠星辰來逼人言羅浮上容易見九垓  
漸高元氣壯涵湧來翼身陰陽迭用事仍俾夜作晨  
咿喔天鷄鳴扶桑色昕昕赤波千萬里湧出黃金鱗

送人遊羅浮

唐司馬退之

不踐名利途始覺塵土腥不味稻粱食始覺神骨清  
羅浮奔走外日月無短明山瘦松亦勁鶴老飛更輕  
逍遙此中客翠髮皆長生艸木多古色鷄犬無新聲  
君有出俗志不貪英雄名傲然脫冠帶改換人間情  
去矣丹霞路向曉雲瞢瞢

送鄭丞之羅浮

唐楊衡

百年泛飄忽萬事繫衰榮  
高鴻脫繒繳達士去簪纓  
始從天目遊復作羅浮行  
雲臥石林密月窺花洞明  
全形在氣和習默憑境清  
夙秘絳囊訣屢投金簡名  
鐘筦促離觴煙霞隨去程  
何當真府內重得歎平生

贈羅浮易煉師

楊衡

海上多仙嶠靈人信長生  
營衛冰雪姿嘒嚼日月精  
默書絳符遍晦步斗文成  
翠髮晞腸長金舄凌風輕  
焚香叩虛寂稽首回太清  
鸞鷟振羽儀飛翻拂旌旌

左挹玉泉液右挹雲芝英顧得叅龍駕拔天度赤城

懷仙

唐陳陶

丹靈五牙客昨日羅浮歸赤斧尋不得煙霞空滿衣  
試於華陽問果遇三茅知採藥向十洲同行牧羊兒  
十洲隔大海浩渺不可期空留雙白鶴巢在長松枝  
陶又有句云一鼎雄雌金液火十年寒暑鹿麕衣

五龍潭

朱余

靖

安道曲江

峭嶺盤遠郊幽泉生石罅沮洳成深潭神龍隱其下  
存身此盤蛰得時扶造化雲漢勿憂旱移湫救函夏

朱明洞

宋  
蘇軾

羅浮山萬仞下看扶桑枝默坐朱明洞玉池自生肥  
從來坦率性醉語洩天機相逢莫相問我不記吾誰

畫蘭

為羅浮道士題

蘇軾

秋蘭如美人不採羞自獻時聞風露香蓬艾深不見  
丹青寫真色欲補離騷傳對之如靈均冠帶不敢燕

湯泉

蘇軾

積火焚大槐蓄油災武庫驚燃丞相井凝浣將軍布  
自憐耳目隘未測陰陽故鬱攸火山裂膚沸泉性注

豈惟獨獸駭坐使痴兒怖安能長魚鱉信可烹狐兔  
山中惟木客戶外惟芒屨雖無傾城辱幸免亡國汗

白水巖

蘇軾

環州多白水水際皆蒼山以彼無盡景寓我有限年  
東家著孔子西家著顏淵市爲不貳價農爲不爭田  
周公與管蔡恨不茹三閭我飽一飯足薇蕨補食前  
門生餽新米救我廚無煙斗酒與隻鷄酣歌餞華顛  
禽魚豈知之我適物與間悠悠未必爾樂我所自然

佛迹石

蘇軾

何人守蓬萊夜半失左股浮山若鵬蹲忽展垂天羽  
根株互連絡崖嶠爭吞吐神工自爐鞴融液相綴補  
至今餘隙罅流出千斛乳方其欲合時天匠麾月斧  
帝觴分餘瀝山骨醉后土峯巒尙開闔澗谷猶呼舞  
海風吹未凝古佛來步武當時注罔氏投足不蓋胷  
青蓮雖不見千古落花雨雙谿滙九折萬馬騰一鼓  
奔雷濺玉雪潭洞開水府潛鱗有饑蛟掉尾取渴虎  
我來方醉後濯足聊戲舞回風捲飛雹掠面過強弩  
山靈莫惡劇微命安足賭此山吾欲老慎勿厭求取



谿流變春酒與我相賓主當連青竹筍下灌黃精圃

東新橋

橋屬惠州府羅浮道士鄧守安所建

蘇軾

羣鯨貫鍊索背負橫空霓首搖翻雪江尾插崩雲谿  
機牙任伸縮漲落隨高低轆轤卷巨索青蛟掛長堤  
弁舟免狂觸脫筏防撞擠一橋何足云謹傳廣東西  
父老有不識喜笑爭攀躋魚龍亦驚逃雷電生馬蹄  
嗟此病涉久公私困留稽奸民食此險出沒如鳬鷺  
似賣失船壺如去登樓梯不知百年來幾人沈沙泥  
豈知波濤上安若堂與閭往來無晨夜醉病休扶携

使君飲我言妙割無牛鷄不云二子勞嘆我捐腰犀  
我亦壽使君一言聽扶藜常當修未壞勿使後噬臍

寄羅浮道士鄧守安

蘇軾

十杯羅浮春遠餉采薇客遙知獨酌罷醉臥松下石  
幽人不可見清嘯聞月夕聊戲山中人飛空本無跡

羅浮道院寄邁迨

蘇軾

斷橋隔勝踐脫履欣小憩瘴花已煩紅宮柳猶疎細  
斜川二三子悼嘆吾年逝淒涼羅浮館風壁頽雨砌  
仙山在何許歸鴻時隨羣崎嶇拾松黃欲救齒髮敝

坐令禪客笑一夢等千歲棲禪晚置酒蠻果餐蕉荔  
齋廚苦無羹野餽籃有惠嬉遊趁時節俯仰了此世  
尤當洗業瘴更作臨水袂寄書陽羨兒并語長頭弟  
門戶各努力相期畢租稅

懷酥醪觀安期生

有引

蘇軾

安期生世知其爲仙者也然太史公曰蒯通善齊  
人安期生生嘗以策干項羽羽不能用羽欲封此  
兩人終不肯受亡去子每讀此未嘗不廢書而嘆  
嗟夫仙者非斯人而誰爲之故意戰國之士如魯

仲連虞卿比得道者歟

安期本策士平日交蒯通嘗于重瞳子不見隆準翁  
應如魯仲連抵掌吐長虹難堪踞床洗寧捐扛鼎雄  
事既兩大謬飄然薊遺風乃知經世士出世或乘龍  
豈比山澤臞忍饑啖柏松縱使偶不死正堪爲僕僮  
茂陵秋風客望祖猶蟻蜂海上如瓜棗可聞不可逢

贈鄧守安道士

蘇軾

少壯欲及物老閒餘此心微生江海間坐受瘴霧侵  
可憐鄧道士攝衣問呻吟覆舟却私度斷橋費千金

五色雀

蘇軾

粲粲五色羽炎方鳳之徒青黃縞元服翼衛兩紱朱  
仁心知憫農常告雨霽符

羅浮小圃五詠

人參

蘇軾

上黨天下脊遼東真井底元泉傾海腴白露瀝甘醴  
靈苗此孕育肩膀或具體移根到羅浮越水灌清泚  
地殊風雨隔臭味終祖禰青臣綴紫萼圓實墜紅米  
窮年生意足黃土手自啓上藥無炮炙齧齧盡根柢

開心定魂魄憂患何足洗塵身輔吾生既食首重稽

地黃

蘇軾

地黃飼老馬可使光照人吾聞樂天語喻馬施之身  
我衰正伏櫪垂耳氣不振移根附沃壤蕃茂爭新春  
沈水得穉根重陽養陳新投以東河清和以北海醇  
崖蜜助甘冷山薑發芳辛融爲寒食餠嚙作瑞露珍  
丹田自宿火渴肝還生津願餉內熱子一洗胸中塵

枸杞

蘇軾

神藥不自閩羅浮滿山澤日有牛羊憂夜有野火厄

越俗不好事過眼等茨棘青萸春自長絳珠爛莫摘  
短籬護新植紫筍生臥節根莖與華實收拾無棄擲  
大將元吾鬚小則餉我客似聞朱明洞中有千歲質  
靈虬或夜吹可見不可索仙人倘許我借仗扶衰疾

甘菊

蘇軾

越山春始寒霜菊晚愈好朝來出細粟始覺芳歲老  
孤根陰長松獨秀無衆艸晨光雖照耀秋雨半摧倒  
先生臥不出黃葉紛可掃無人送酒壺空腸嚼珠寶  
香風入牙頰楚些發天藻新萸蔚已滿宿根寒不槁

揚揚弄芳蝶生死何足道頗訝昌黎公恨爾生不早

薏苡

蘇軾

伏波飯薏苡禦瘴傳神良能除五溪毒不救讒言傷  
讒言風雨過瘴癘久已亡兩俱不足道但愛州木長  
草木各有宜珍產駢南荒綵囊懸荔枝雪粉剖檳榔  
不謂蓬荪姿中有藥與糧春爲芡實圓蒸作菰米香  
子美拾橡栗黃精誑空腸今吾獨何者玉粒照夜光

中閣禪院

宋留元崇

初來羅浮山萬變駭林壑更作招提遊佳處在中閣



忽然天地間一縱千里目未論雲頂上此景占仍獨  
近聞泉涓涓青眺山簇簇簷壓喬松低檻有餘霞落  
長風東南來皓月襟袖薄境靜僧幽閒意遠味淡泊  
抱琴歸去來禪榻寄一宿白雲依古山青霄起孤鶴

卓錫泉

留元崇

尋仙得招提借我此歇脚瓜棗未暇求杯水得甘酌  
境空風泉高夜永雲臥薄明當約麻姑石橋騎白鶴  
又題卓錫泉

吾師知地脉杖錫此間卓分占神仙園敲出清冷玉

錫飛已乘龍泉潔可飲鶴林下幾寒暑池中不盈涸  
木石常借潤瓶罌隨量足池無汲綆線逗引走修竹  
渴心生塵埃對此愜所欲洗耳聽松音漱齒汲山綠  
更携一壺歸爲浣衆生濁遙愧山中人四時自斟酌

景泰禪閣

宋 譚 粹

二山相傳成禪閣出山半仰觀青冥逼俯見白石粲  
錫杖湧玉泉鐵橋通銀漢巍然槩諸天恍若登彼岸  
無人解菩提松濤自昏旦

何仙姑祠

宋 梅 蟠

昔聞謝自然今祠何人仙  
昌黎久不作奇事相留傳  
當其始生時紫雲光燭天  
煉服雲母丹紅玉飛瓊煙  
窈窕顏不老霞帔尙翩翩  
琪花露含蕊瑤水月在蓮  
恍若坐深閨真息長眇綿  
左携魏夫人右挾夏嬋娟  
不入天台路永同龍漢年

麻姑壇

宋  
王獻臣

我佩綠綺琴獨上麻姑壇  
七絃試拂拭一天星斗寒  
仙子爲我來降語五雲端  
世人知音少君今休要彈

澄虛閣

王獻臣

此地留仙竈仙人去何早一粒藥初成空山絕靈州  
竈傍五色土令人百病好况復餌丹人朱顏幾時老

明發石壁庵

宋白玉蟾續卷

有客東北來翻然袖長蛇掀髯石壁前人間日已斜  
前望羅浮山千峯如排衙魚龍吹海水灑雨行天涯  
何處安期生種棗大如瓜見說蒲澗中尚有九節茱  
後來葛稚川亦得飯胡麻自汲水簾洞笑咽黃金沙  
海山溟古今縹緲煙月賒急呼南海神采采扶桑花  
我欲騎天風去歸五雲家整衣謁紫皇及此鬢未華

嗟彼紅塵人還如兔在置胡不學飛仙白日昇九霞

贈水簾洞黃秀才

宋 林千之

讀書避世喧結廬五雲表淡薄足生涯詰曲藏深杳  
仰觀紅日近俯視衆山小滄溟舞澎湃雲氣度浩渺  
喬松蔓翠蘿絕壁藏啼鳥一派從天來長練掛木杪  
海鷗忘機智峒蝶忙飛繞亦知山房靜而被俗客擾  
作詩寄殷勤努力須壯少他年騰踏去蕙帳猿驚曉

次前韻

宋 龔日章

攀蘿訪山扉極目窮海表峯疑廬山高巖若盤谷杳

藥臼歷窮凹石樓迫天小水簾雲頂飛丹葉天涯渺  
古峒匝蝴蝶閑庭喧百鳥誦聲雜石溜炊煙出林杪  
藜燭雖未輝翠屏自環繞內樂屏紛華天機蔑膠擾  
蠶鹽比膏粱所得孰多少會須携竹爐一鳴聽鷄曉

釣魚臺

宋陳允升

羅浮山萃律安有釣魚臺臺居觀東隅此名從何來  
昔時爨下童辛勤水與柴歲久功行完豹變山陰霾  
一朝採幽澗恍然江海涯篙師艤舟在相與語詠諧  
爨童有行計篙師相與偕得魚饋主翁辭去挽不回

傍者躡其蹤扁舟往巖崖始信武陵源有路通塵埃  
回視所遺魚化作溝中材古有恒真人事豈欺我哉  
太公渭水濱白頭佐子陵七里灘清風永可懷  
爨人去幾秋魚臺尙崖嵬此名照青史此石封蒼苔  
我來筆其事靈跡救沈埋山中勝事多對此空徘徊

宿冲虛觀

宋 胡 衍雲峯  
廬陵

鐘靜日已夕塵緣謝驅役琪樹鶴爭定山空萬籟寂  
明月散庭除寒光照床席花鳥魂夢間相見曾相識  
五更仙鹿鳴聲近在籬隙曉來問童子石徑無行跡

羅浮

宋 鄭康佐

泰華端培塿羅浮霄漢隣俯視雲煙飛冠蓋摩星辰  
凝神想至道窈窕難具陳未究訪安期竚立空逡巡

卓錫泉

鄭康佐

大士西方來誅茆老幽麓振錫風雲上飛泉滂山腹  
泓自清甘千里田疇足源深而流長何必貴川瀆

蓬萊閣

鄭康佐

獨占林泉勝金碧耀青冥凭闕俯八極縹緲降玉京  
羣仙日往還簫韶聞九成鸞鳳爲我導恍然遊蓬瀛



鐵橋

鄭康佐

青蛻跨兩山龍鳳互撐拄  
顧來雙鳬孰云通步武  
壺中杳靄間遐想神仙侶  
夢錫九霞丹翩翩遊紫府

水簾洞

鄭康佐

仙人開碧戶玉溜瀉潺湲  
飛流散珠璣灑落隨天風  
三伏不知暑有如水晶宮  
平生邱壑性歌嘯翠微中

石樓

鄭康佐

危橋橫碧漢隱約山之顛  
下窺滄海大宇宙相連延  
天風吹寒水恍惚遊飛仙  
飄飄吹凌虛還爲塵俗牽

夜樂池

鄭康佐

清籟起虛簷笙竽驚夜眠音調自諧暢恍如奏鈞天  
眞仙聚臨賞鸞鶴舞蹁跹凌晨日杲杲濯纓美潺湲

鄴仙騎牛石

鄭康佐

橫笛騎青牛巖扉自開闢倏然乘風馭雲收煙滅迹  
眞人不可見空遺舊泉石我來獨徘徊日暮千山碧

葛仙祠

鄭康佐

乘雲朝太清煙霞鎖故宅逍遙十洲上遂與人寰隔  
泉石獨泠泠遺竈粲朱碧欲追汗漫遊安得生羽翮

黃野人

鄭康佐

至人隱洞天蒼苔滿澗石長嘯響空巖咫尺雲霧隔  
白鶴未歸來何以慰晨夕流泉自涓涓秋宵山月白  
白雲庵謁先君寺丞詩 鄭康佐

清癯野鶴姿問道羽衣客白雲濯飛泉青霞窺烈石  
閒猿嘯清曉藥鳥鳴日夕幽人不可見百拜訪遺迹

期羅浮蕭鍊師不至

明孫

贊

仙衍  
南海

石室松桂秋涼風滌殘暑柴門敞空曲曠夕懷仙侶  
簫笙久不至鶴馭今何許朗月流清輝山中幾延佇

望羅浮二首

明陳璉琴軒東莞

仙山鬱嵯峨千古青未了樓臺起中天鐘磬出林杪  
奇香散仙葩五色翔神鳥誰能躡高頂洞覽周八表  
誰將羅浮山分來奠南土峯巒餘四百歷歷青可數  
泉源近福地靈勝開千古曾見黃野人雲中騎啞虎

望羅浮

明湛若水甘泉增城

人事百窘迫望山心一怡苦樂本無門惟人自召之  
祥禽厭雕籠幽鳥擇高枝鷦鷯乃自足瑣瑣亦何爲

兼卜朱明兩洞

湛若水

遂卜朱明西乃兼朱明東東西如日月天地留元同  
何以愛東洞蝦蟇起青空何以愛西洞麻姑秀芙蓉  
朝日未出時先見東海紅新月欲吐夜坐待西巖中  
日月互來往吾以觀無窮

荅龐嵩

號弼唐

湛若水

龐公隱鹿門有人拜床次朱明隱龐子五方執經至  
朱明於鹿門境勝無以異人心有全經無言住天地  
隱顯語默時疇或知其義世有孔顏徒可以與于是  
明當脫樊籠與子坐超詣

釋菜喜霽詩

明黃佐

泰泉香山

短雨投翳蒼促鱗泳汀潄頷頷各棲息喧悲非所欽  
浩浩朱明天周羅昔幽尋龍光彌釣石鶴鳴振皋音  
絳魚豈足繫塵境何由侵李陳轍迹遠冥漠交神衿  
浮游構崇祝俎豆臨嶇欽雨歇增波瀾孤青出遙林  
厲急復陵緬采芳自青深藻蘋一以薦風生松灌吟  
遲旭粲霞綺層崖散嵐陰倏爾翔寥廓安排竟無心  
天華宮  
黃佐

危石駕紫霄幽谷吐白雨誰爲真蛟蜃駕構窮莽楚

鋤雲得翠碣。緬想翬飛宇。甘霖雨蓋地。明曠拱禮鼠。  
迢遞奏阿房。天運能幾許。况持清海節。么麼虫沙主。  
黃龍詫真符。三芝望霞舉。玉馬朝洛州。執挺長降侶。  
餒魂夕銷燐。俎豆忽環堵。萬物一指間。獨契漆園語。

朱明洞緩聲歌

三首

黃佐

朗朗朱光晶。肅肅朱火兵。朱旂化峯嶸。簇疊環朱明。  
耀真肇丹臺。飛雲巢紫清。干景守刼切。罡風運流鈴。  
左揖白元尊。右袞交無英。同歸太信根。桃康保黃寧。  
曉發黃龍洞。夜宿朱明天。朱明何高高。大羅相連延。

元始命天真授我雲篆篇九光駐飛轂三華返胎轅  
上窺無復色下際寧有淵永言保冲虛真心同太元  
晨陽避元仞琅霄敞颺臺濯濯鶴上仙續緇乘雨來  
水簾發紅泉金沙燦琉璃琳和殷珠樹扶光入東隈  
鼓輪漉胎息混合神風迴元命歸太初千椿尚嬰孩

梅花村前畬人薦酒詩

黃佐

落落梅花村前有燒畬客殷勤芳樹下酌以縹玉白  
杯盤山古寄鷄黍自山澤陶然巾車去和風蕩長陌

釣鰲石

黃佐



任公昔垂釣超然龍伯先巨鰲一入手綸竿都棄捐  
鎮此蓬山下化石今千年豈爲豫章翁拂石開蒼煙  
坐觀萬物備胸中羅九天正如得巨鰲不屑圖小鮮  
泉源涵有象松風韻無絃冥棲不復見悠悠東逝川

臥遊羅浮 四首

明 陳獻章 公甫新會

馬上問羅浮羅浮本無路虛空一拍手身在飛雲處  
白日何冥冥乾坤忽風雨簑笠將安之徘徊四山暮  
一度一萬劫飛空本無鐵何名爲飛空道是安排絕  
久天宇高霜清萬籟徹手持青琅玕坐弄碧海月

天風吹我笠吹下黃龍頂兩手提笠行不知白日暝  
赤松見我笑却立千丈影童子問赤松雲深各不領  
山■必有靈土高豈無異翠浮幾千丈日月東南翳  
我尋五嶽來未問仙家事絕頂望九州衡山正西峙

通天巖

明  
黎民表

惟敬  
從化

鬱羅隱蕭臺矯飛不可扣耿耿闕幽仄迢迢歷星宿  
道逢疾輪客倏與青精覲相携毓華林行歌采三秀

仙女巖

黎民表

龜臺何名堯下臨西極天靈妃舞雲輶嬉遊携列仙

鯨波忽簸蕩浮來知幾年至今三青鳥猶巢珠樹顛

鳳浴潭

黎民表

翩翩五色鳥乘雲自丹穴覽輝千仞岡弄影寒潭潔  
飲啄豈不謀腥腐非所屑虞羅爾何施清冷坐怡悅

黃野人庵

黎民表

黃野仙已去於菟守靈關松風起萬壑時復乘鸞還  
朗吟梅花句清麗非人間披衣出澗戶朗月沈空山

單道開石室香火廟

黎民表

至人鍊真形冬夏常穴處細石伴瓊節饑來自堪煮

萬形等歸盡逍遙斂神去香火遺嵌巖霞蹤杳何許

宿飛雲頂見日庵

明張

津廣漢

秣馬臨朱明理策還自支登高自林麓因得窮幽奇  
二樓標石叢一橋跨水湄羅山屹中天浮山鬱相持  
四百三十峯羅列如諸兒夜來仙樂鳴呼童酌清卮  
蘿月映孤岑山風卷薄帷須臾海色動萬國迎朝曦  
因思孔聖沒豈有長夜時起視庵之前寸心空自悲  
西北尚浮雲東南日繭絲所願荅昇平功業愧未熙  
倘遂營丹砂來尋鹿與麋愴然別羽客且結汗漫期

南遊

明

王守仁

陽明  
餘姚

九疑不可問羅浮如可攀  
遙拜羅浮雲莫以雙瓊環  
渺渺洞庭波東逝何時還  
人生不努力艸木同衰殘

題湛甘泉居

王守仁

我聞甘泉居近連菊坡麓  
十年勞夢思今來快心目  
徘徊欲移家山南尙堪屋  
渴飲甘泉泉饑餐菊坡菊  
行看羅浮雲此心聊復足

江行望羅浮

二首

明

習韶

我有相思心寄之羅浮山  
丹崖燦瑤樹待我秋風還

世路不可極悠悠若循環獨立遺天地江波今古間  
客行越江邊冉冉江路長平生一卷書爲爾鬢髮蒼  
驚風吹鴻鵠萬里猶故鄉安得挾雙翼與之俱翱翔

題蕭鍊師止庵

明李德

元風本虛寂其要乃無爲擾擾狂馳予營營何所之  
隙光豈待人倏如流電飛及時不自勉他日我爲誰  
樂哉庵中人止止復奚疑

羅浮山

明林挺

神山浮海來上與星辰通  
司命佐南嶽作鎮滄溟雄  
雙樓屹危山鐵橋亘天中  
巖端漱飛泉瑤臺錯玲瓏  
靈譎信超越玉簡闕神宮  
誰其冥寂士來此訪元風  
丹砂尚髣髴仙書未易逢  
俯拾金芝英仰攀瑤樹叢  
梯雲望出日扶桑生海東  
天鷄鳴中宵寒波淡溟濛  
明霞太親人直接蓬萊宮  
不恨隔中州走望禮視公

不邇聲利途逋客絕遊踪亮哉美吾土長願偃微躬

天華庵

明陳自立

孤庵顏天華琳館依芳樾秋霄寒碧梧萬籟寂不發  
瑤風響笙竽斜日散金屑坐久夜色侵啼螿滿苔穴  
偶懷僞漢宮疎燈耿明滅

黃龍洞奉懷龐振卿

明祁衍曾  
張仲東莞

杪秋獨行行恣意歷羣岫欻然山雨來蒼茫目將西  
披簑入洞中龍眠知我乞澄潭深不流飛瀑一何溜  
盤旋路百折石壁淨如剖天華固朝露西庵詎能久



巍峩五賢祠千載傳不朽繼之有龐公誅茆傍祠右  
忘年夙托交贈我雙瓊玖豈不愜素心良晤却非偶  
悠悠宇宙間嗟哉吾老友

題青霞谷甘泉書舍

明鄭善夫

客有羅浮君羽衣行翩翩長揖謝世事煉性三十春  
沉澁不滿口貌如藐姑神問道廣成子空同高嶙峋  
在瓢倚樹枝振鳥天風門竭來弔延陵晤言東海濱  
示我紫尸術挺身入層雲誓將結瑤華引領長相親

泰泉艸廬

明張治

翩翩奉臬于戢耀栖朱明竭來隱金馬廳飛復南征  
言採菖蒲花笑揖安期生圓景煥中夜九鳳翀霞鳴  
相携駕之去逍遙騰紫清願滌垢氛耳豁落聞天聲

瑤石臺

明王文祿

羅浮四百峯上有瑤石臺和光映泉轉秀色中霄開  
仙靈蘊堅素瑕瑜將無猜臚吹霓帶緩手攬霞文裁  
抱朴獻宸陛馭雲京華來邂逅憶初約夢繞春風梅  
鴻思忽縹緲鶴信時徘徊劫塵謝超獨壺景還相偕

寥陽夜飲

明韓鳴鸞

伯原博羅

夜飲寥陽殿明月何娟娟舉杯邀明月形影似相憐  
酒滿月在手酒盡月還天步月醉欲臥明月來床前  
醉時同交歡醒後各茫然

飛雲頂

明黃克晦

絕頂類左首瑤艸滿蓬邱雲氣懷我身盈盈衣上流  
升高會有極四望何悠悠仰見天宇曠俯瞰坤軸浮  
遠海露微碧杯水覆堂坳昔人云此地三更日色浮  
人間苦晝短何不住上頭曾聞積女工堪爲燎火謀

題見日圖

明林鴻

昔有學道者擔簦海上行  
宴坐羅浮峯內視觀無形  
晞景正東豁滉漾扶桑明  
雲濤既涵涌龍獸亦悲鳴  
吾聞混沌分坤軸東南傾  
百川走虛空日功生窮濱  
未覩大明運安知至陽精  
願從列仙徒散髮倚雲屏  
三花漱雲液五內合晶瑩  
回觀羅浮圖陋哉山海經  
羅浮雜興 六首  
明孝廉出家 李雲龍 烟客  
爲二嚴師  
浮山千餘仞上有珠樹林  
雲霞互虧蔽鸞鶴巢其陰  
仄聞紫煙客羽駕紛來臨  
玉液有餘清雲璈多遠音  
我無雙飛翼失路杳難尋  
安得如珠黍聊用慰我心

泉源有福地朱明有洞天琪花與朱草遠近相勾連  
阜鄉遺鳥人曾此挹飛泉秦王誇好道漢武侈求仙  
不知蓬萊島乃在縣寓間甲帳空零落樓船竟不還  
石樓何高高上有殄霞人頭帶遠遊冠出入騎黃麟  
照影神湖上濯足瑤池濱池畔多芝草千秋長如春  
麻姑戲其旁粲然啓朱唇笑彼蜉蝣輩寧知金骨身  
潭中有浴鳥相傳是鳳皇不飲復不啄徧體生文章  
商風西北起將舉復迴翔世無梧桐枝爾當遊何方  
石洞何陰陰中有千章木山風日夕吹霜條森似玉

苦節諒不移肯受膏雨沐百卉在沃壤芬芳徒過目  
志士處憂患焉知不爲福

涼風日夕至吹我瑤石臺嚴霜被野艸噉噉清猿哀  
俯視見流光悠然生遠懷寂寞天華宮豈無歌舞來  
焉見安期生羽衣變寒灰

登羅浮

八桂秘南經雙山雄粵望偉哉昔所聞於今觀其狀  
彌天列青靄絕地聯層嶂掩苒艸木平陂陀谿谷壯  
雖然盛積阻極目何超曠雲巒時絕續泉聲日奔放

飛樓候朝暉倒影排溟漲相傳蓬島來  
復矣陶唐尙事往誠莫稽蹟湮理無妄  
禱禽應白杵暗虎懷仁讓虫書篆符竹  
蝶化遺衣桁翳維羽人宅信此餘風暢  
陰崖饒異產神藥滋蓋藏名遺炎帝書  
類絕稽含訪伊昔休明會位與王侯抗  
時勤玉璽封未昧高山響望秩禮久虛  
旱魃人猶仰我來仲夏月溽暑陽方亢  
臥聞夜來雨飛出龍池上何因霈九州  
蒼生企靈貺

宿寶積寺

金力未疲日已停西峯將酌石上泉  
迤邐投雲松

幽寺肅古苔絕壁懸高牕列席就清陰開襟面涼風  
石牀倚林標遠眺千里江原野漸微沒井邑方空濛  
今古一朝暮宇宙何終窮茫茫大夢內往哲留其蹤  
聊爲命觴壺冥寄開心胸

遊黃龍洞

春草夏更長洞門藹餘綠晨興理孤策衣露時沾渥  
緬邈睇衆峯逶紆赴長谷粼粼涉谿影蕭蕭翳巖竹  
風磴炫雜花雲潭亂雙瀑沫雨晴驟飛游鱗清可掬  
荒宮久榛莽石岬多隈曲方齊昔人蹤茲焉遂幽築



冲虚觀

浮生無百年脆質今二毛言尋仙人居焉憚登陟勞  
褰衣遵澗曲輟棹逾平臯輕風澹餘雲仰見巖岫高  
眞宮傲峻宇飛陛臨層霄羣峯列垣墉衆壑深溪橋

石池曜紅蕖乳竇凝金膏猿鳥分夜鳴林泉聲相遭  
緬懷著書人丹砂樂南交幽洞俯日月天路流雲璈  
慮釋神必凝理得形自超安知後來者澹蕩非吾曹

羅浮黃龍洞對雪

浙浙天上風吹我白日沒飛瀑漸無聲寒溪遂生骨  
仰視老人峯雲中玉爲笏嶽嶽積已平飄灑殊未歇  
迴旋若翔舞廉纖亂毫髮客子宿茅茨居然見衝突  
重檐及戶牖堆壓不可掘南州炎德在况此仙靈窟  
丹火伏不興初陽動猶蹶判此始衰年擁衾坐明發

賴逢酒力良未使吟聲竭夜久迴聞鐘山曉不待月  
始知蓬島來往事非荒忽請看朱明天化作金銀闕

晚出寶潭見潭中羅浮山影

明

李

正

正甫  
番禺

我登羅浮岑周覽各千里迴瞰大澤南不見寶潭水  
由潭以望山得之則孔邇俯視水中影仰接長天勢  
仙嶠何蜿蜒澄淵亦溶潏輕颺盪微瀾安流恬不逝  
疊巘屢浮沒層崖忽搖曳丹霞被翠嶂倒濯何其媚  
返照入崇阿餘青射蛟際宮觀何玲瓏若出澄泓底  
泉瀑何偃蹇復綴滄波裏我神逝其間在此亦在彼

遐想天雞鳴海日生於子

羅浮山志會編卷之十五

終